



## ***Komunikadu Imprensa***

23 Maiu 2013

### **Tribunál Distritál Suai fó pena suspensaun ba kazu violénsia doméstika**

Iha 17 Maiu 2013 Tribunál Distritál Suai halo julgamentu ba kazu violénsia doméstika ne'ebé komete husi arguidu hasoru nia kónjuje. Aktu ne'e akontese iha Sub Distritu Balibo, Distritu Bobonaro.

Ministériu Públiku akuza katak iha 4 Julu 2012 arguidu dehan nia feen mak hanesan fetu puta tanba nia sai no fila ba uma iha kalan. Arguida lori katana, tuda ba lezada nia ain loos no kauza nia hetan kanek iha ain-kabun sorin loos.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 Lei Kontra Violénsia Doméstika. Iha alegasaun finál, Ministériu Públiku husu ba tribunál atu kondena arguidu ho pena tinan ida iha prizaun maibé suspende ba tinan 2.

“Hahalok arguidu nian iha kazu ne'e mak sériu tanba nia uza kro'at atu hakanek vítima. JSMP kestiona sé artigu 145 kona-ba ofensa ba integridade fízika simples mak apropriadu iha situaun ne'e,” dehan Diretór JSMP Luis de Oliveira Sampaio”.

Arguidu konfesa aktus ne'ebé nia komete hasoru nia feen no promete ba tribunál katak nia sei la kontinua aktus hanesan ne'e hasoru nia feen.

Tribunál prova katak arguidu komete violénsia doméstika hasoru nia kónjuje no kondena arguidu ho pena prizaun ba tinan 1 maibé suspende ba tinan 2. Arguidu tenke mós selu kustu judisiál \$30.

Kazu ne'e rejista iha Tribunál Distritál Suai ho Númeru Prosesu: 83/2013/TDS. Julgamentu prezide husi Dr. Constançio Basmery. Dr. Felismino Cardoso, Prokuradór Internasionál, representa Ministeriu Públiku. Arguidu hetan defeza husi Dr. João Henrique husi Eskritóriu Defensória Públiku.

Atu hetan informasaun kle'an liután favór kontaktu:

Luis de Oliveira Sampaio

Diretór Ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)

[info@jsmp.minihub.org](mailto:info@jsmp.minihub.org)

Telephone: 3323883 | 77295795

Website: [www.jsmp.tl](http://www.jsmp.tl)

Face book: [www.facebook.com/timorleste.jsmp](http://www.facebook.com/timorleste.jsmp)

Twitter: @JSMPtl